

開放文學 – 風花雪月 – 禽海石 弁言

曩聞譚瀏陽言：造物所以造成此世界者，只是一「仁」字。餘竊以為不然。蓋仁字之範圍甚褊，未足以組織乾坤，網維宇宙也。餘以為造物之所以造成此世界者，只是一「情」字。世界上一切形形色色，如彼山川人物、草木鳥獸，何一非情之所集合者？使世界而無情，則天必墜、地必崩，山川人物、草木鳥獸，將莫不化為冰質，與世界末日無以異。故凡生存於此世界者，莫不有情。

兒女之情，情之小焉者也。特是人為萬物之靈，自人之一部分觀之，則凡顛倒生死於情之一字者，實足為造物者之代表。是以善言情者，要必曲繪夫兒女悲歡離合之情，以泄造物者之秘奧而不厭其煩。